



SAMBAND ÍSLENSKRA SVEITARFÉLAGA

Umhverfis- og auðlindaráðuneytið
Skuggasundi 1
150 Reykjavík

Reykjavík 15. september 2020
2009638SA KB
Málalykill: 00.64

Efni: Umsögn um áform um breytingu á lögum nr. 52/1989 um ráðstafanir gegn umhverfismengun af völdum einnota umbúða fyrir drykkjarvörur – mál nr. 164/2020

Vísað er til tilkynningar í samráðsgátt stjórnvalda, dags. 31. ágúst sl., þar sem kallað er eftir umsögnum um fyrirhugaðar breytingar á lögum um ráðstafanir gegn umhverfismengun af völdum einnota umbúða fyrir drykkjarvörur. Þær breytingar sem ætlunin er að verði í frumvarpinu eru:

1. Áformað er að samræma orðalag ákvæða við lög um meðhöndlun úrgangs og lög um úrvinnslugjald sbr. myndun hringrásarhagkerfisins.
2. Áformað er að bæta við markmiðsákvæði í lögum
3. Áformað er að skilakerfið nái til fleiri aðila, að skilagjald hækki í samræmi við vísitölu neysliverðs og að umsýsluþóknun taki breytingum.

Með frumvarpinu er ætlað að koma til framkvæmda nokkrum af tillögum er komu fram í skýrslu starfshóps um drykkjarvöruumbúðir en skýrsla hópsins kom út 4. júlí 2018. Málið tengist einnig náið aðgerðaáætlun í plastmálefnum sem kynnt var nýlega.


Sambandið styður umrædd áform um breytingar á lögum um ráðstafanir gegn umhverfismengun af völdum einnota umbúða fyrir drykkjarvörur enda er mikilvægt að hækka skilagjald á drykkjarumbúðir og auka hvata til bættra skila og þar með minnka líkur á því að umbúðir skili sér ekki til endurvinnslu. Nauðsynlegt er einnig að umsýslugjöld á einingu standi undir kostnaði við þjónustu. Það er jákvætt að stefnt er að því að skilagjaldið nái til fleiri aðila en nú er og þannig auka líkur á myndun hringrásarhagkerfisins.

Sambandið vill þó vekja athygli á því að eðlilegt er að tilgreina sambandið sem hagsmunaaðila enda hefur það neikvæð áhrif á sveitarfélög ef drykkjarvöruumbúðir skila sér ekki í réttan endurvinnsluferil heldur enda á móttökustöðum sveitarfélaga t.d. sem blandaður heimilisúrgangur.

Einnig þykir rétt að hvetja til þess að innleiða lágmarkskröfur framleiðendaábyrgðar, í anda nýlegrar löggjafar ESB um hringrásarhagkerfið, sem m.a. getur falið í sér þrepaskipt gjöld, og hvetja þannig framleiðendur til þess að velja umhverfisvænni kosti en ella þegar kemur að umbúðum. Einnig þarf að skilgreina kostnaðarhlutdeild framleiðenda gagnvart þáttum sem snúa að sorphirðu og fræðslu og mögulega fleiri þáttum sem stuðla að betri meðhöndlun úrgangs.

Virðingarfyllt

SAMBAND ÍSLENSKRA SVEITARFÉLAGA

A handwritten signature in blue ink, appearing to read 'Karl Björnsson', written over a horizontal line.

Karl Björnsson
framkvæmdastjóri